

BERDAD NUNCA
A PERJUDICA
NINGUN HENDE
NINGUN CAUSA
NI NINGUN
NACION.....

Diario

E MATUTINO DI ARUBA


DIABIERNA 5 APRIL 1991

ABONADO PA LUNA AFI. 19,00 ** PA EJEMPLAR 0,80 AÑA10/NO.3296

Ricibimento di un heroe Arubano



Un multitud di familiares y personanan tabata presente pa ricibi e sargento di 82nd Airborne Division di ehército Mericano cu a participa den Operacion Desert Storm, e Arubano Ricky Oduber. Nan tur a dune un bonbini riba suelo dushi, unda cu el a pasa su dushi dianan di infancia y di su juventud. Riba e potret akiriba por mira na momento cu Ricky ta acercando e multitud den Aeropuerto Reina Beatrix y e otro potret ta muestra na momento cu su tata Dolfi Oduber ta brazando su yiu. Loke a pasa den Golfo Persico ta un experiencia grandi y inolvidable pa e joven arubiano. Na Aeropuerto el a drenta den un limousine y esaki a transporte pa Tivoli Club, unda den un ambiente familiar y di amistades nan a combera cu prensa. Pa mas detayes lesa pagina 11.



Ricky Oduber ricibi como heroe na Aeropuerto ayera atardi

ORANJESTAD (AAN): Ayera a pisa e suelo di Aruba, un di nos hendenan cu a tuma parti den e Guerra den e Golfo.

Un multitud di familiares y personanan tabata presente pa ricibi y dun'e un bonbini riba suelo dushi, unda cu el a pasa su dushi dianan di infancia y di su juventud.

Apenas tabatin un representante di gobierno cu no ta ni ministro ni parlamentario. Loke naturalmente ta di ser observa y di ser lamentá.

Despues pa seis'or di atardi unda cu tabatin un conferencia di prensa unda un gran parti a brilla pa nan ausencia, cu excepcion di Diario y Canal 90, cu a percura pa transmiti e entrevista cu Ricky Oduber.

Ricky no a ser recluta pa drenta servicio pa USA na e ocasion aki pa libera Kuwait, sino cu Ricky ya tabata den servicio militar, sirbiendo na Alaska y soportando un clima frieuw di bao cero.

Aki ta caminda el a ser yama

pa forma parti di esnan cu a bay pa libera Kuwait for di e garra di Saddam Hussein, esta di Irak cu a podera di Kuwait.

Un experiencia grandi y inolvidable pa nos joven arubiano, kende no solamente dor di e cambio di temperatura, pero di ta cla pa drenta den accion pa e causa di ser defendi. Mescos cu tur otro den e situacion tabata corda riba e destinacion riba e campo di batalla.

E tabata encarga cu loke ta trata e municion. Hasta e mescos cu e otronan mester a come un "camel steak" na lugar di su acostumbrado funchi cu stoba cu semper el a lanta y gusta cun'e.

Na Tivoli Club den un ambiente familiar y di amistades, e momento tabata grandi pa Ricky y su mayornan, hunto cu familiares y amigos y conocirnan.

Nos por bisa cu esaki tabata agradable, pero di un banda lamentable, ya cu ni un parlamentario, ni ministranan, ni sikiera a haci acto di presencia. Loke ta



trece nos un biaha mas na e conocido dicho "Nunca Bo Ta Rey Riba Bo Mes Suelo".

E aventura aki no ta uno facil pa lubida, ni sikiera pa sali asina liher for di loke por ser constata como un nachtmerrie.

Ricky a perde peso mescos cu su compañeronan na frontera di batalla, pero a gana e admiracion di mundo y di su hendenan.

No ta prome biaha cu nos gobernantenan ta lubida riba nan hendenan, y esaki ta conoci ya for di tempo di e segunda guerra mundial.

Tabata agradable y admiracion pa nos Ricky y di un lamentacion pa nos di mira cu ni sikiera un di nos gobernantenan a haci acto di presencia.

Nos ta un fiscal di nos sociedad pa duna tur bon noticia y condena tur inhusticia y ta di lamenta cu un gran parti di prensa a brilla pa nan ausencia na e conferencia di prensa aki cu tabata uno di gran valor pa nos y pa un yiu di nos cu a tuma parti den e Guerra den e Golfo